

MEMORIA XUSTIFICATIVA E ECONÓMICA

CONVENIO DE COLABORACIÓN ENTRE O INSTITUTO ENERXÉTICO DE GALICIA (INEGA) E A CORPORACIÓN RADIO E TELEVISIÓN DE GALICIA, S.A., PARA A REALIZACIÓN DUNHA SERIE DE PROGRAMAS SOBRE AS COMUNIDADES ENERXÉTICAS NO MARCO DO PROYECTO DE COOPERACIÓN TRANSFRONTERIZA DENOMINADO 0052_COMENERG_1_E, NO ANO 2024

O director do Departamento de Enerxía da Axencia Instituto Enerxético de Galicia (Inega)

DECLARA: Que esta entidade de dereito público ten previsto formalizar ca Corporación Radio e Televisión de Galicia, S.A. (CRTVG), o instrumento convencional arriba referido por un período de vixencia que abrangue dende o día seguinte ao da súa sinatura e remata o 31 de decembro de 2024.

Que o instrumento convencional ten por obxecto establecer as condicións de colaboración entre o INEGA e a CRTVG para realización dunha serie de programas televisivos emitidos baixo o nome ou lema de "AFORRO, AUTONOMÍA E SUSTENTABILIDADE":

- Aforro: Reduce os teus custos enerxéticos e aforra a longo prazo.
- Autonomía: Toma o control da túa enerxía e se independente de grandes provedores.
- Sustentabilidade: Constrúe un futuro sostible para a túa comunidade e o planeta.

Que o instrumento convencional que se pretende asinar se fundamenta no seguinte:

ANTECEDENTES, RAZÓNS DE OPORTUNIDADE E OBXECTO

O Inega é unha entidade instrumental do sector público autonómico con personalidade xurídica e patrimonio de seu para o cumprimento dos seus fins que se constitúe en Axencia por Decreto 142/2016, do 22 de setembro, mantendo a súa adscrición a Consellería competente en materia de enerxía, conforme ao establecido na Lei 3/1999, do 11 de marzo e entre os seus fins están "o fomento, impulso e realización de iniciativas e programas de actuación para a investigación, o estudo e o apoio das actuacións de coñecemento, desenvolvemento e aplicación das tecnoloxías enerxéticas, incluídas as renovables, a mellora do aforro e a eficiencia enerxética, o fomento do uso racional das enerxías e, en xeral, a óptima xestión dos recursos enerxéticos dos distintos sectores económicos de Galicia, así como a participación na xestión e prestación, se é o caso, de servizos noutros campos sinérxicos ao enerxético, de acordo coas directrices do goberno no ámbito das súas competencias".



Na actualidade, é necesario continuar avanzando nas políticas enerxéticas dentro do Marco Estratéxico de Enerxía e Clima europeo, nacional e autonómico, destacando en canto a este último a "Estratexia Galega de Cambio Climático e Enerxía 2050" e a "Axenda Enerxética de Galicia 2030", a través da posta en marcha de novas propostas que redunden na consecución dos obxectivos enerxéticos e medioambientais establecidos como camiño cara a unha transición enerxética efectiva e co máximo aproveitamento dos principais recursos enerxéticos renovables de orixe local, como é o caso das comunidades enerxéticas.

O Inega é socio beneficiario do proxecto COMENERG: Comunidade enerxética transfronteiriza para a transición cara á autonomía e sustentabilidade enerxética das localidades da Raia, cun orzamento de 2.002.015,81 €, está financiado ao 75% polo Fondo Europeo de Desenvolvemento Rexional (FEDER) dentro do programa INTERREG VIN-A España Portugal (POCTEP) 2021- 2027.

O proxecto foi aprobado polo Comité de Xestión mediante decisión do 28/09/2023 e, o 10 de outubro de 2023, asinouse o Acordo entre a Autoridade de Xestión do POCTEP e o Beneficiario Principal do proxecto, a Deputación Provincial de Ourense.

O período de execución abarca dende o 1 de xullo de 2023 (abrange gastos de preparación da candidatura) ata o 31 de decembro de 2026.

O proxecto está incluído no OBXECTIVO POLÍTICO 2 "Unha Europa máis verde e baixa en carbono", PRIORIDADE DE INVERSIÓN 3 "Avanzar na transición ecolóxica e a adaptación ao cambio climático do espazo transfronteirizo a través da cooperación como ferramenta para o fomento da economía verde e a economía azul" e OBXECTIVO ESPECÍFICO 2.2 "Potenciar as enerxías renovables de conformidade coa Directiva (UE) 2018/2001 sobre enerxías renovables, incluídos os criterios de sustentabilidade que se establecen nela".

O proxecto COMENERG aborda o reto de incrementar o peso das enerxías renovables sobre o consumo bruto final de enerxía no espazo transfronteirizo de Galicia-Norte de Portugal a través do impulso de iniciativas piloto de descentralización da produción de enerxía a pequena escala, orientadas ao autoconsumo en zonas rurais, que se enfrontan ao reto demográfico e ao envellecemento poboacional.

A divulgación das razóns científicas e técnicas que inspiran a normativa existente para posibilitar a implementación das experiencias piloto de comunidades enerxéticas, o estudo e divulgación dos resultados das mesmas, favorecendo a creación de novas comunidades enerxéticas a ambos os dous lados da fronteira..

Asemade, as ideas fundamentais das comunidades enerxéticas como o aforro, autonomía e sustentabilidade é necesario difundir para que cheguen ao coñecemento da sociedade



en xeral e impulsen a posta en marcha de novas experiencias de comunidades enerxéticas nas que a produción para o autoconsumo se faga a partir de novas fontes tamén de carácter local.

O Inega considera á Corporación RTVG, único canal de televisión autonómico que presta servizo público en toda a Comunidade Autónoma de Galicia, garantindo cobertura no territorio galego e entendendo a súa sinal a certas áreas do espazo transfronteirizo de Galicia-Norte de Portugal, un medio idóneo e único para dar a coñecer os beneficios relacionados coas comunidades enerxéticas con este alcance, e que por este medio considérase de grande importancia revitalizar e impulsar a súa programación en todo o que respecta a esta materia. Ademais, a súa natureza pública implica que a Corporación RTVG actúa como un vehículo de interese xeral, sen fines lucrativos, alineándose directamente cos obxectivos estratéxicos do proxecto COMENERG.

A Corporación RTVG, ten o interese e deber, como servizo público que é, de dar a coñecer e promover entre a súa audiencia a divulgación de programas mediante os que se acade unha formación integral dos galegos na importancia que ten o proxecto COMENERG para unir aos concellos transfronterizos na transición cara a un futuro sustentable a través do impulso das comunidades enerxéticas para beneficiar aos seus cidadáns e ao medio ambiente.

Dentro deste mutuo interese, pola Corporación RTVG e o Inega, e ao obxecto de procurar de modo conxunto o desenvolvemento das accións necesarias neste interese común, formalízase este convenio de colaboración co obxecto da realización dunha serie de programas televisivos emitidos baixo o nome ou lema de "*AFORRO, AUTONOMÍA E SUSTENTABILIDADE*". O Inega achegará os datos necesarios para a elaboración dos guións de información por parte da Corporación RTVG.

Tendo en conta que se trata dunha actuación única promovida pola Corporación RTVG, a achega económica do Inega para esta finalidade farase por concesión directa a esta entidade, a través da sinatura dun convenio de colaboración, non sendo posible promover concorrência pública por non existir outras alternativas razoables ao non existir ningunha outra entidade mediática que comparte as características comentadas por representar esta entidade o 100% da produción galega.

A sinatura dun convenio de colaboración, entendido como un negocio xurídico bilateral que ten por obxecto articular unha colaboración entre as partes para a consecución dunha finalidade que resulte de interese común para ambas, xustifícase por concorrer os seguintes elementos:

- 1) Existencia dunha distribución de funcións polo que respecta á execución das actuacións que son obxecto do negocio xurídico, de forma que ambas partes participan na realización material das mencionadas actuacións.



- 2) Posta en común de medios económicos para a realización do proxecto, de forma que ambas partes participan na financiación das actuacións obxecto do convenio e asumen, conxuntamente, o custo derivado da realización das ditas actuacións.
- 3) Participación conxunta no resultado das actuacións obxecto do convenio, de forma que os resultado das ditas actuacións é de propiedade ou utilización conxunta opo compartida por ambas partes.
- 4) Existencia dunha organización común para a coordinación e xestión das actuacións que son obxecto do convenio, o que se concreta nunha comisión de seguimento composta por representantes de ambas partes.

Además, a Corporación RTVG é un ente público dependente da Xunta de Galicia e, polo tanto, ten a consideración de medio propio, derivándose deste carácter público autonómico gallego un importante aforro económico correspondente á prestación do obxecto deste convenio.

Os antecedentes expostos xustifican as razóns de oportunidade para propoñer a formalización dun instrumento de colaboración entre o Inega e a Corporación RTVG para a realización dunha serie de programas sobre as Comunidades Enerxéticas baixo o lema "AFORRO, AUTONOMÍA E SUSTENTABILIDADE.

ORZAMENTO E FINANCIAMENTO

Para a realización do obxecto do convenio, o Inega aportará un orzamento que ascende a corenta e sete mil euros (47.000,00 €), con cargo á aplicación orzamentaria 09.A3.733A.640.01, dos orzamentos xerais da Comunidade Autónoma de Galicia para 2024, sendo esta partida económica axeitada para asumir o custo desta acción por considerarse pola súa propia natureza como un activo configurado como un investimento de carácter intanxible que deberá incrementar o valor das políticas públicas acometidas polo Inega neste ámbito e que non dará lugar a investimentos reais de carácter material.

Pola súa banda, a Corporación RTVG contribuirá cun máximo de corenta e sete mil euros mil euros (47.000,00 €), aportación na que se poderán consignar custos de estrutura (persoal, materiais, instalacións, equipamento, etc.) que a entidade empregue no desenvolvemento das accións contempladas na cláusula primeira e responsabilizarse de organizalas na súa totalidade, en estreita colaboración co Inega.

A Corporación RTVG empregará a totalidade da achega económica desta cláusula nas accións derivadas do obxecto deste convenio, non obtendo ningún beneficio económico desta consignación orzamentaria



LEGALIDADE

Atendendo a que o obxecto de colaboración proposto non está comprendido no texto vixente da Lei de contratos do sector público, aprobada pola Lei 9/2017, do 8 de novembro, no seu artigo 6, o seu réxime xurídico virá determinado polas estipulacións previstas no propio convenio e os principios xerais resultantes da citada lei.

Ademais, a actuación que se pretende realizar non garda relación co funcionamento do mercado interior no sentido ao que se refire a comunicación interpretativa da Comisión (2006/C179/02), xa que polo exposto queda perfectamente xustificado que o obxecto do convenio non encerra, potencialmente, interese para os operadores económicos doutros estados membros, pola súa escasa incidencia económica.

Deste xeito, respectase a xurisprudencia sentada polo Tribunal de Xustiza das Comunidades Europeas, que impón unha obriga de transparencia no sentido indicado.

Polo anterior, e a fin de cumprimentar o preceptuado no artigo 15.2 da Lei 1/2016, de 18 de xaneiro, de transparencia e bo goberno, estímase xustificado o recurso á a sinatura do instrumento convencional que se pretende, con exclusión doutras figuras.

Santiago de Compostela, na data da sinatura dixital.

O director do Departamento de Enerxía

Javier Domínguez González

